

Europa on et Schwääjelsdüüsje

En de EU hant Kommissare
als Fachministere et Saare.
Die dont dr ganze Daach rejiere,
on tespetiere, formuliere,
die ordne aa on kontrolliere,
vür allem dont se rejuliere.

Wat dä Beamteapparat
van su-e Kommissariat
sisch en de Büros usjedaat,
wid en Jesätzesform jebraat.
Dann krit dä Schäff ¹ dat Blatt fü Blatt
fü düreschzekicke vürjelaat.
On wat dä ongeschrevve hät,
dat hät va dō aa Jültischkeet
vam Baltikum bes nõ Jibralta,
van Skandinavije bes Malta,
jelt, kott jesaat, europawik,
och für de Bundesrepublik.

Su ha-se neulisch Parajraafe
für Stromsparlampe nöi jeschaffe.
Druß hät dann dä Europarat
dat passende Jesätz jemaat.
De Bürjer kreesche ² metjedeelt,
dat dat Jesätz va jetz a jelt,
on wutte dōzo opjeroofe,
die Stromsparlampe sisch ze koofe.
Die spare sesche Enerjie.
Se kauße ävve och völl mi!

¹ Chef ² kriegten

Jedauch weil Brüssels Kommissare
verlange, Enerjie ze spare,
- dat send diesäleve Kommissare,
die deenßlich decke Autos fahre -
hant Fachjeschäfte, wie se saare,
ahl Biere ¹ janet mi op Laare ².

Me weëß nauch joot: Komkommere ³
die wore fröhje krommere.
Wie Jurke jetz genau jeformp
sen mösse, dat eß längß jenormp.
Die wutte eefach schnack jezüsch ⁴,
dat hōdde Kommissare sisch
en Kommissjuune usjedaat.
Sitdäm wid dat esu jemaat.
On Brüssel deet dōdrōvve waache,
Dat Buure dat och rischtisch maache.

Jedauch wat heemlich on em Stelle
Beamte rejuliere welle,
jeet och bej Vōllbloot-Eurokraate
dürsch-us net emme jlatt vanstatte.

Dr Zijarätteraucher weëß,
wie onjesonk et Piefe eß.
Dat steet en jrueße Schreff och op
de Zijarätteschachtel drop.
Wat ävve alles bejm Hantiere
met Schwääjele su kann passiere,
erfiyet, wänn-e se koofe jeet,
dr Schwääjelsduusekööfer net.
Dänn dat steet en Europa op
de Schwääjelsdüüsere net drop.
Beamte send at längere
dōbej, dat bald ze ängere.

¹ (Glüh-)Birken ² auf Lager ³ Gurken ⁴ gezüchtet

Damet en Zokonëf jede weëß,
wie brankjefielisch fempe ¹ eß,
hant se sisch fü dr nääkste Somme
en nöjjeVürschreff vürjenomme.
Enzwesche send bereits konkreete
on janz diskreete Enzelheete
dovan nõ usse dürëschjedronge,
die och at en de Ziedong stonge.

En de Europa-Union
soll op de Schwääjelsduuse stõnn,
dat Schwääjele en alle Klüere ²
jõõ net en Kengehäng jehüere,
weil Kenge dauch net wesse könne,
wie liët zom Bejspell Kreßbööm bränne.

En ernste Warnung deet verkönde,
em Böisch kee Füürsche aanzezönde.
On op en Duus steet baal die Reejel:
Met ene usjebloõse Schwääjel
moß me ze-iësch jet waade bes
dä Kõpp net mi am jlöhne ³ eß.
Iësch dann eß nämlisch zwiefelsfrej
de jrözde Brankjefoë ⁴ vrbej.

Fü wänn dann dauch ens jet passiert,
eß zosätzlisch nauch opjeführt,
wie wirkungsvõll on fachjemääß
en Brankwong ⁵ ze behandle eß.
De Nomme van de Füürwehrwaach,
fü wämme ens ene Brank äntfach.
Wie me Alarm schleet, wid jezejsch,
on wie dat op Buljarisch heesch.
On - nävve-r-e Beld met Brankruine -
steet, wõ me Löscheräät kann lihne ⁶.
On dat en knapp zwei Dutzend Sprõõche,
sujaa en Öscher Platt, für Qõche.

¹ mit Feuer spielen ² Farben ³ glühen ⁴ Brandgefahr
⁵ Brandwunde ⁶ (aus-)leihen

Fü all die Röötschlääsch ävve sen
die Schwääjelsduuse hü ze kleen.
Iesch op e DIN A6-Format
krit me dat alles ongebraat.

Betraufe van die Möößnahm wör
dann jede EU-Europäer.
Dauch jääje dä jeplaande Möß ¹
erhiff sisch häftije Protäß
van London övve Rom bes Wien,
van Lissabon bes nō Berlin.

Et rebälliere Demokrate,
de Räntner, Bundeswehrsoldate,
de Industrie- on Handelskamme(r)
on de Jewerkschaff »Füür on Flamme«.
En Skatklubs on Naturschotzkreese
well me van su-n Idee nüüß wesse.

Et protästiere Bayere, Friese,
Franzuuse, Brite, Portujiese.
En Südeuropa fenge Jriesche
dat alles mä nauch füze Kriesche.
Om Balkan schubbe ² de Rumääne,
en Skandinavije de Dääne.
Slowaake, Pole on de Tschäsche
dont jetz at häftisch więsprääsche.
En Irland send bereits de Ire,
met Fahn on Flööt am demonstriere,
en Zypere de Zypriote,
en Jruęßbritannije de Schötte
en hön karierde Schötteröck,
met Plümme ³ a de wisse Söck.

Wänn die en Brüssel dat em Stelle
wie vürjesenn su maache welle,
dann wör Europa, dat eß kloę,
net dat mi, war et vürher wor.

¹ Unsinn, Quatsch ² schimpfen ³ Troddeln, Quasten

Bevür dä Ärjer janz massiv
op Luxemborech nauch övvejrief,
maach isch ene Vürschlaach, fü die nätte
on nüdjje Akzjuun ze rätte.

Paulinsche us-em Struwwelpeete
däm käänt us Kengedaach jö jede.
Dat hött, wänn meng Erennerong stemmp,
döheem met Schwääjele jefemp,
su lang bes dat Paulinschens Hoore
on och si Kleed am bränne wore.



Die kott Jeschisch ¹ eß raffiniert
on realistisch illustriert.
Dat Beld, wie et jeloofe kött
on at en hälle Flamme steet,
soll op de Schwääjelsduuse sen.
Dat mahnt janz sesche Jruß on Kleen.

Dö bruch me janüüß bej ze schrieve,
on och dat alt Format kann blieve.
Et hött dr Zwäck erföllt on eß
dauch ene jode Kompromess!?

¹ kurze Geschichte